

Morning Dogri (NSD) National News Bulletin 14-05-2024

आकाशवाणी

- बीजेपी दे वरिष्ठ नेता ते प्रधानमंत्री नरेन्द्र मोदी होर अज्ज वाराणसी लोकसभा सीट थमां अपना नामांकन दाखल करगंन।
- लोकसभा चुनां दे 7में ते खीरले गेड़ लेई नामांकन भरने दा अज्ज खीरी ध्याड़ा ऐ।
- कल होए दे चौथे गेड़ दे मतदान च 67.71 फीसद लोकें वोट पाने दे अपने अधिकार दा इस्तेमाल कीता।
- बीजेपी दे वरिष्ठ लीडर ते बिहार दे साबका उपमुख्यमंत्री सुशील मोदी होर पूरे होई गे न। प्रधानमंत्री नरेन्द्र मोदी हुंदे सनें केई नेताएं उंदी मौती पर दुख प्रगट कीता ऐ।
- मुंबई च इक होर्डिंग दे डिग्गने कारण मरोने आले दी गिनतरी 14 होई गई ऐ।
- आभा खटुआ नै भुवनेश्वर च नैशनल फेडरेशन कप एथलेटिक्स प्रतियोगिता च सुन्ने दा तगमा हासल करियै नमां रिकार्ड कायम कीता ऐ।

<><><><><><>

Varanasi

भाजपा दे वरिष्ठ नेता ते प्रधानमंत्री नरेन्द्र मोदी होर अज्ज वाराणसी निर्वाचन क्षेत्र थमां नामांकन दाखल करगंन। लोकसभा दी वाराणसी सीट आस्तै 7में ते खीरी गेड़ च वोट पाए जांगन। इस गेड़ लेई पर्चा भरने दा अज्ज खीरी दिन ऐ ते वोट 1 जून गी पाए जांगन।

<><><><><><>

Election Update 4th Round

लोकसभा दे चौथे गेड़ च अजे तगर मिली दी जानकारी मताबक तकरीबन 67.71 फीसदी मतदान दर्ज कीता गेआ। इस गेड़ च 9 राज्यें ते 1 केन्द्र शासत प्रदेश दिएं 96 लोकसभा सीटें लेई मतदान होआ।

आंध्रप्रदेश च 76.50 फीसदी, बिहार च 57.06 ते तेलंगाना च 64.74 फीसदी मतदान होआ। जम्मू कश्मीर च 37.98 फीसद मतदान दर्ज कीता गेआ। मध्यप्रदेश च 70.98 फीसदी मतदान दर्ज कीता गेआ। महाराष्ट्र च 59.64, उत्तर प्रदेश च 58.05 ते पच्छिम बंगाल च 78.37 फीसदी मतदान दर्ज कीता गेआ।

<><><><><><>

Sushil Modi

बिहार दे साबका उपमुख्यमंत्री ते बीजेपी दे वरिष्ठ नेता सुशील मोदी हुंदा कल नमीं दिल्ली च काल होई गेआ। ओह 72एं बरें दे हे। सुशील मोदी होरें पिछले म्हीने आखेआ हा जे उनेंगी कैसर ऐ जेहदे कारण सेहत नरोई नेई रौहने करी ओह 2024 दा लोकसभा चुनां नेई लड़गन। बिहार दे मजूदा उपमुख्यमंत्री विजय कुमार सिन्हा होरें सोशल मीडिया पर इस बारे जानकारी सांझी करदे होई आखेआ ऐ जे बीजेपी दे वरिष्ठ नेता ते बिहार दे साबका उपमुख्यमंत्री सुशील मोदी होर पूरे होई गे न। प्रधानमंत्री नरेन्द्र मोदी होरें सुशील मोदी हुंदे पूरे होई जाने पर गैहरा दुख प्रगट करदे होई आखेआ जे उनें बीजेपी दे उत्थान ते बिहार दी तरक्की च जेहड़ा योगदान दित्ता, उसी कदें बसारेआ नेई जाई सकदा। सुशील मोदी हुंदी मौत पर बीजेपी दे केई होर नेताएं गैहरा दुख प्रगट कीता ऐं केन्द्र मंत्री अमित शाह होरें अपने सौगी सनेए च आखेआ जे बिहार नै इक महान सियासी लीडर गी सदा-सदा लेई मोहाई दित्ता ऐ जेहदी सियासत गरीबें ते पिछड़े वर्गें दे लोकें गी समर्पत ही। बीजेपी दे राष्ट्रीय अध्यक्ष जे.पी.नड्डा होरें आखेआ जे सुशील मोदी हुंदा पूरा जीवन बिहार ते उत्थूं दे लोकें गी समर्पत हा ते उंदे अनकथ जतन राज्य गी विकास बाद्धे दी बत्तै पर लेई जाने च मते मददगार साबत होए।

<><><><><><>

Mumbai Hoarding

मुंबई च कल तेज अंधी-झक्खड़ दरान इक होर्टिंग डिग्गने कारण मरोने आलें दी गिनतरी 14 होई गई ऐ जिसलै जे 43 होर घायल होई गेदे न। मुंबई दे घाटकोपर इलाके च छेदानगर जंकशन च 100 फुट लम्मा हॉर्डिंग खुल्लियै पेट्रोल पंप ते कन्नै दे मकानें पर जाई पेआ। महाराष्ट्र दे मुख्यमंत्री एकनाथ शिंदे होरें मारे गेदे लोकें दे परोआरें गी 5-5 लक्ख रपे दी सीधी सहायता देने दी घोषणा कीती ऐ।

शिंदे होरें हादसे आली थाहरै दा दौरा कीता ते आखेआ जे घायलें दे इलाज दा सारा खर्चा सरकार चुक्कोग। मुखमंत्री होरें आखेआ जे इस हादसे लेई जिम्मेदार लोकें खलाफ मनुक्खी हत्या दा मामला दर्ज कीता गेआ ऐ ते उंदे खलाफ सख्त कोला सख्त कारवाई कीती जाग।

<><><><><><>

Abha Khatua

आभा खटुआ नै भुवनेश्वर च नैशनल फेडरेशन कप एथलेटिक्स प्रतियोगिता च 18.41 मीटर दी दूरी तगर महिलाएं दी गोला सुट्टने आली प्रतियोगिता च सुन्ने दा तगमा जित्तिथै राश्ट्री कीर्तिमान स्थापत कीता ऐ। महाराष्ट्र दा प्रतिनिधित्व करने आली आभा दा इक प्रतियोगिता कोला पैहले मनप्रीत कौर दे कन्नै 18.06 मीटर दा संयुक्त रिकार्ड ऐ। कलिंग स्टेडियम च कल 18.41 मीटर दी दूरी तगर गोला सुट्टने दे बाद आभा राश्ट्र रिकार्ड बनाने आली इक मात्र खडारी बनी गई ऐ।

<><><><><><>

IPL

आईपीएल क्रिकेट च गुजरात टायटंस दी टीम प्ले ऑफ दी द्रौड़ शा बाहर होई गई ऐ। कल रातीं अहमदाबाद दे नरेन्द्र मोदी स्टेडियम च कोलकाता नाईट राईडर्स दे खलाफ उंदा मैच बरखा कारण बिजन इक बी गेंद कराए रद्द करी दित्ता गेआ। जेह्दे कारण दौनें टीमें गी 1-1 अंक हासल होआ ते कोलकाता नाईट राईडर्स लेई टॉप टू यानि दऊं अब्बल टीमें दी थाहर पक्की होइ गई। हुन पिछली जित्तु टीम चेन्नई सुपर किंग्स ते रॉयल चैलेंजर्स बेंगलुरु समेत 6 टीमं प्ले ऑफ च अपनी थाहर पक्की करने दी द्रौड़ च न। आईपीएल च अज्ज दिल्ली कैपिटल्स दा मकाबला लखनऊ सुपर जायंटस कन्नै होग।

<><><><><><>

Indonesia

इंडोनेशिया दे सुमात्रा टापू उप्पर चानचक्क आए दे हाडें ते ज्वालामुखी शा निकलने आले लावे कारण तकरीबन 41 लोकें दी मौत होई गई।

शनिवारें होई दी भारी बरखा कन्नै सुमात्रा दे सारे कोला सक्रिय ज्वालामुखी माउंट मरापी दी राख बगने करी दो जिलें ओह्दे च डुब्बी गे। इस वजह करी 100 शा मते घर तबाह होई गे ते मती गिनतरी च लोकें दी मौत होई गई। 17 लोक अजें बी लापता न। जंदे ब'रे 5 दिसम्बर गी ज्वालामुखी फट्टने कन्नै 23 यान्त्रुएं दी मौत होइ गई ही ते इस ब'रे फरवरी च चानचक्क आए दे हाडें कन्नै केई घर तबाह होई गे न।

<><><><><><>

NTA

राश्ट्रीय परीक्षा अजेंसी एनटीए नै 13 मई गी सांझी विश्वविद्यालय परीक्षा सीयूईटी 2024 दा एडमिट कार्ड जारी करी दित्ता ऐ। मेदवार एह्दी अधिकारिक वेबसाईट परा अपना एडमिट कार्ड डाउनलोड करी सकदे न। एह मतेयान 15 कोला 18 मई 2024 दरान 379 शैहरें च आयोजित कीता जा'रदा ऐ। इंदे चा 26 शैहर भारत थमां बाहर न। मेदवार अपना एप्लीकेशन नंबर ते डेट ऑफ बर्थ लिखियै एडमिट कार्ड डाउनलोड करी सकदे न।

<><><><><><>

Punjab Heat Wave

पंजाब दे मौसम मैहकमे नै आखेआ ऐ जे अगले 4-5 दिन लूह चलग, तापमान बधग ते खुश्क मौसम रौहग। कल तापमान 3 डिग्री सैल्सियस मता दर्ज कीता गेआ ते अबोहर कस्बे च सारें शा मता 43.7 डिग्री सैल्सियस दर्ज कीता गेआ। मैहकमें नै लोकें गी सलाह दित्ती ऐ जे ओह् समें-समें उप्पर मौसम बारे अपडेट रौहग।

<><><><><><>